

釋迦如來應化事蹟

二

釋迦如來應化事蹟


第二卷

生活·讀書·新知三聯書店

### 華嚴大法

華嚴經云爾時如來始成正覺在寂滅場與四十一位法身大士及宿世根熟天龍八部一時圍繞如雲籠月是時如來現盧舍那身說圓滿修多羅名為頓教此經有七處九會三十九品說世主妙嚴如來現相普賢三昧世界成就花藏世界毘盧遮那如來名號四聖諦光明覺菩薩問明淨行賢首升須彌山山頂偈贊十住梵行發心功德明法升夜摩天夜摩偈贊十行十無盡藏升兜率天兜率偈贊十回向十地十定十通十忍阿僧祇壽量菩薩住處佛不思議十身相海如來隨好普賢行如來出現離世間入法界等品譬如日出先照高山次照幽谷乃至普照一切大地但山有高下照有先後如來出現世間亦復如是成就如是無量無邊法界智光先照菩薩次照緣覺次照聲聞次照決定善根衆生隨機受化然後普照一切衆生





華嚴大法

### 頓制大戒


梵網經云爾時盧舍那佛坐千葉蓮花上放大光明告千花臺上釋迦佛說心地中金剛寶戒是佛本源菩薩佛性種子一切衆生皆有佛性爾時釋迦牟尼佛初成正覺已初結菩薩波羅提木叉應當孝順父母師僧三寶孝順至道之法孝名為戒亦名制止佛即放無量光明為諸大衆說一切諸佛大乘戒佛告諸菩薩言汝等一切發心菩薩大衆諸佛子應當受持佛子諦聽若受佛戒者國王王子百官宰相比丘比丘尼十八梵天六欲天子庶民黃門婬男婬女奴婢八部鬼神金剛神畜生乃至變化人但解法師語盡受得戒佛子有十種無盡藏戒第一不殺生第二不盜財物第三不邪婬第四不妄語第五不酤酒第六不說四衆過第七不自讚毀他第八不慳惜加毀第九不瞋心不受悔第十不謗三寶及第一不敬師友至第四十八破法等戒諸佛子皆當敬心奉持





### 觀菩提樹

莊嚴經云世尊初成正覺無量諸天皆悉稱贊如來功德爾時世尊觀菩提樹王目不暫捨禪悅為食無餘食想不起於座經於七日欲界色界諸天子等手捧金盆各執寶瓶盛滿香水來詣佛所頭面頂禮請如來澡浴世尊受請浴已諸天子等各各奉獻天妙衣服燒天妙香散天妙花供養如來無量天龍人等各取如來澡浴之水以自灑身皆發道意諸天子等各還天宮所將餘水香氣不滅惟聞佛香不聞餘香心生歡喜發菩提心時有天子名曰普花白言世尊世尊住何三昧於七日中結跏趺坐身心不動佛言如來以喜悅三昧為食而住由此定力於七日中結跏趺坐不起於座為居此處斷除無始無終生老病死故於七日觀樹不起至二七日周匝經行三千大千世界以為邊際至三七日觀菩提場目不暫捨斷除生死得成佛道



日  
三


觀  
菩  
提  
樹



### 龍宮入定

本行經云世尊向摩利支處而坐時迦羅龍王復有目真隣陀龍王詣於佛所白言我此宮殿已曾布施諸佛今日世尊受我宮殿憐憫我故少時住此佛受而坐經於七日不起時彼七日興雲注雨起大冷風雨不暫停遂成寒凍時諸龍王從宮殿出以其大身七重圍繞擁蔽佛身復以七頭垂世尊上作於大蓋巖然而住莫令世尊身體寒冷風濕諸蟲觸世尊體時龍王化作年少婆羅門身在於佛前頂禮佛足而白佛言我今不以恐怖憊亂如來但恐世尊身有冷風塵觸世尊體思惟是事覆世尊身爾時世尊告目真隣陀龍王言汝大龍王來受三歸並受五戒汝當長夜得安樂故時目真隣陀龍王即白佛言如世尊勅不敢有違其目真隣陀龍王即從佛所受三自歸依歸依佛歸依法歸依僧復受五戒於世間中最初龍王而得度也

龍宮入定




林間宴坐

本行經云爾時世尊於龍宮定起有一天子神通自在身出大色最勝光明照彼尼拘陀樹以天光明自照明朗詣向佛所頂禮佛足即白佛言我於往昔為牧羊子當於世尊為菩薩時在彼六年苦行之中曾將乳汁淨心供養奉上世尊復折尼拘陀樹枝為作蔭涼以此善根因緣即便命終得生三十三天為大福德威力天子我今得世果報况今世尊得成無上菩提惟願世尊今當為我還彼樹下受彼樹蔭隨意安樂憐愍於我世尊聽許願往昔日牧羊子之所尼拘陀樹下跏趺而坐世尊往詣彼樹下入定七日不動以解脫力受安樂故爾時世尊以過於彼七日之後正念正知從三昧起告天子言汝天子來可從我邊受三自歸並及五戒汝當長夜得安樂故而彼天子受佛勅已即受三自歸及受五戒已時於世間最初天中成優婆塞




林間宴坐



日  
五

### 四王獻鉢

本行經云世尊思惟過去諸佛皆悉持鉢而受於食時四天王各從四方持四金鉢奉上世尊世尊不受將四銀鉢世尊不受四頗梨鉢而亦不受四琉璃鉢亦復不受四瑪瑙鉢而亦不受四磲磔鉢亦復不受時毘沙門天王告餘天王言我念往昔青色諸天將石鉢來奉我等白言今此石鉢仁等可用受食而喫復有一天子來白我言慎勿於此石鉢受食宜應供養比之如塔當來有佛出世號釋迦牟尼可將此鉢持奉世尊時四天王速疾還宮各執石鉢盛滿天花以香塗鉢來詣佛所共將四鉢奉佛白言唯願世尊受此石鉢世尊復念此四天王以信淨心奉我四鉢我亦不合受持四鉢若受一人三人有恨我今總受四王之鉢爾時世尊受四天王鉢已如是次第相重安置左手受已右手按下神通力故合成一鉢堅牢清淨四際分明




日六

四王獻鉢



## 二商奉食

本行經云北天竺有二商主一名帝黎富婆二名跋黎迦駕五百牛車路經乳汁林不遠而過車牛皆不肯行時守林神謂商主言此處有佛始成正覺汝今最宜在前將麩供養商主聞已即各將麩酪蜜和揣至世尊前頂禮佛足白言願為我等受此麩酪蜜揣爾時世尊即以天王所奉石鉢從二商主邊受於麩酪蜜和之揣即便咒願如法而食食已即告彼二商主言來從我受歸依佛歸依法歸依僧復受五戒當令汝等長夜安樂獲大善利商主聞已即共白言如佛聖教我等不違即便共受三自歸依並受五戒於人世間最初得度商主白佛願乞一物造塔供佛世尊即與二商佛身髮爪而告之言若見此物與我無異商主受髮爪已頂禮世尊圍繞三匝辭佛而去



日  
七

二商奉食

梵天勸請

莊嚴經云爾時大梵天王與六十八拘胝梵衆來詣佛所頂禮佛足白言世尊如來為諸衆生求無上覺今得成佛唯願世尊轉於法輪世尊默然觀察世間念言我證寂靜涅槃之法為人演說彼等皆不能了知是故默然時大梵天王及帝釋天王乃至三十三天衆頂禮佛已而請如來轉於法輪佛告梵王言我證甚深微妙之法最極寂靜難見難悟非分別思惟之所能解唯有諸佛乃能知之是故默然時大梵天王觀摩伽陀國多諸外道等於地水火風空橫生計度著於邪見以為正道而彼衆生雖修邪道有應度者今當度之唯願世尊為此等衆生故轉於法輪世尊以佛眼觀見諸衆生上中下根起大悲心轉於法輪天王聞已即於佛前忽然不見爾時地神告虛空神唱言如來今受梵王勸請轉於法輪虛空神聞展轉傳至阿迦尼吒天